

NNA STU VIUOLU



Passaru nentirimenu già ddu' anni
e simu sempri cca a cuntrastari
cu stu virus ca spunta a tutti bbanni
faciennu smorfi pi-ffarini scantari.

Na vota si travesti ri babbeu,
s'ammuccia, pui cumpari
all'impruvvisu
e cu la manu nni fa marameu
pigghiannuni pi fissa c'un-surrisu.

Cuomu a diri: cca cumannu iu,
uatri a dinucchiuni aviti a stari
nun ci- av'a- essiri ummira ri Ddiu,
né prieri, né missi e mancu artari.

Tra chiddi scantulini, certaruni,
a li paroli ri ddu cifirazzu
chiurieru li finestri e li barcuni
e nna la porta mittieru n-catinazzu.

Ma chissà è veru vita ri dannati...
chiusi nta na tana cuomu armali,
ca simu appiddaveru cunzumati
siddu ra vita chistu è lu finali.

Ma Ddiu retti lumi a li scinziati
e nziemula si misiru a sturiari:
"Stati tranquilli nun-vi custirnati
sulu sintiti socchi c'è di fari.

Lu vaccinu è prontu, lestu curriti,
na punturedda e vi ntravardati,
si corchi fastiddiu pui avvirititi
è nenti, m'a saluti varagnati."

Ora ognarunu fa la propia parti,
mierici, nfirmera e vuluntari
e nziemi a iddi nui ri stari allerti
e ncuraggiari a cu- n-su voli fari.

Nna stu viuolu unnè ca iu caminu
viu n-filu r'erva tènniru e trimanti
è la spiranza ri un nuovu ristinu,
puru si stanca vuogghiu iri avanti.

E mentri scrivu sientu nostargia
ri parienti e amici r'abbrazzari
e già lu cori forti sbulazzia
pinzannu all'allirizza ri pruvari.